

# ოქროს ლანცეტის დასტაქარი

## პროფესორ გივი გონჯილაშვილის გახსენება



წელს, ზამთრის მიწურულს, ქართულმა სამედიცინო სამყარომ უკანასკნელ გზაზე გააცილა ზოგადი ქირურგიის თვალსაჩინო წარმომადგენელი, 90 წლის მხცოვანი პროფესორი, ვლადიმერ (გივი) გონჯილაშვილი. იგი იყო აკად. გრიგოლ მუხაძის მედლის მფლობელი და მუხაძისვე აღზრდილი. ორი ტიტანის, მიხეილ ჩაჩავასა და ეგნატე ფიფიას საყვარელი მოწაფე და საქმის გამგრძელებელი. თავად უსაფუძვლოდ როდი ხუმრობდა, „გრიგოლ მუხაძის შვილიშვილი ვარ“-ო. როდესაც ბატონი ეგნატეს ვაჟს, პროფესორ ვახტანგ ფიფიას მწვავე აპენდიციტმა შემოუტია, ბატონმა ეგნატემ ბატონი გივი საოპერაციოში იხმო და ეს ოპერაცია მას მიაწოდო.

1991 წელს ბატონი გივი ღირსების ორდენის კავალერი გახდა, ხოლო 1999 წელს მადლიერმა კოლეგებმა ზოგადი ქირურგიის კათედრის ამავდარ გამგეს დაბადებიდან 70 წლისთავთან დაკავშირებით გამართულ ტრაპეზზე სიურპრიზი მოვუწყვეთ და ოქროს სკალპელი გადავეცით.

საოპერაციო მაგიდასთან ბატონი გივი ოლიმპიური სიმშვიდით, დახვეწილი, მოზომილი და ამავე დროს ელეგანტური და ლაზათიანი მოძრაობებით გამოირჩეოდა; პეანის მომჭერს ზაფხულობით, თიანეთში შვებულებისასაც ვერ ელეოდა და ჯიბით ატარებდა. კუჭის რეზექციის სამი და „ჩარობად“ ქოლესისტექტომიის ერთი ოპერაცია ბატონი გივისთვის ჩვეულებრივ დღიურ დატვირთვად ითვლებოდა და ნაკლებს დაგეგმვის უფლებას არც თანამშრომლები ვაძლეოდით - მისი სამუშაო დღე ხომ სისხამ დილით, 7 საათზე კლინიკაში მორიგე ქირურგთან ერთად შემოვლით იწყებოდა.

ბატონმა გივიმ ოჯახი მის კოლეგასთან, ქალბატონ დებდემონა (დები) ჩაგანავასთან შეჰქმნა და მასთან მხარდამხარ მამულს სამი სასიქადულო შვილი აღუზარდა: ნანა - ფილოლოგიის მეცნიერებათა კანდიდატი და თსუ ლექტორია, უფროსი ვაჟი, ბატონი თემური - ცნობილი მეღვინე, მეცნიერებათა კანდიდატი, ჩინეთის, ინგლისისა და საფრანგეთის საერთაშორისო გამოყენების ოქროს მედალოსანი, ხოლო უმცროსი ვაჟი, ბატონი ვლადიმერ (მამუკა) გონჯილაშვილი კი მამის საქმის ღირსეული გამგრძელებელი, მედიცინის მეცნიერებათა დოქტორი (1993 წ.), თბილისის ცენტრალური საავადმყოფოს კლინიკური დირექტორი, ივანე ჯავახიშვილის თბილისის სახელმწიფო უნივერსიტეტის ასოცირებული პროფესორი, მეტაბოლური ცენტრის ხელმძღვანელი, დიაბეტის ქირურგიული მკურნალობის სკოლის ფუძემდებელი და ქირურგიაში არაერთი ნოვაციის დამნერგავია.

ბატონმა გივი გონჯილაშვილმა, თავად პოეტურმა, პოეზიაში ვაჟას რომ აღმერთებდა, იცხოვრა და იღვაწა კაცურად, ქვეყანას ღირსეული შთამომავლობა დაუტოვა და ვალმობილი შეუერთდა ზეცად მყოფ ქართველ დასტაქართა სახელოვან კოჰორტას.

*ვასილ არჩვაძე*

*ზოგადი ქირურგიის დეპარტამენტის  
ასოცირებული პროფესორი*